

欽定大清會典事例

欽定大清會典事例卷四百

禮部

風教 訓飭風俗二

道光元年

諭御史郭泰成奏請嚴禁晉省私販鴉片煙一摺。鴉片煙一項。敗壞民風。久經飭禁。茲該御史奏稱山西太谷介休等處。竟有富商大賈。販此牟利者。著成格飭屬嚴查。將販賣之人拏獲。按律懲治。毋令漸染成風。有害民俗。○又

諭那清安等奏審明已革大名府知府王履泰等傳喚

女檔在署聽曲一案。據稱大名府城接壤東豫。常有女檔班往來流寓等語。此等惰民。攜帶幼女。沿途賣唱漁利。最為風俗人心之害。直隸山東河南境內。時有女檔班流寓。甚至出入官署。不可不嚴行禁止。著方受疇錢臻姚祖同各嚴飭地方官逐加查察。如有女檔班在其境內。即行驅逐。或遞回原籍。勒令改業。毋使輾轉流染。以挽澆風。○又

諭御史馬步蟾奏請禁外城開設戲園戲莊一摺。京城前三門外。居民輻輳。歲時伏臘。戲園演劇聚醮。原不在例禁之內。若如該御史所奏。士民挾優釀飲。耗竭

資財。曠廢職業。則因此導侈長惡。不可不嚴行飭禁。現當過密之時。均已不禁自止。但恐嗣後仍蹈舊習。著步軍統領五城豫行示禁。將來仍有前項徵逐歌場招搖侈肆者。隨時嚴拏懲辦。以杜奢靡而端習尚。○四年諭。御史李逢辰奏請嚴禁淫詞邪說一摺。國家祀典。自有常經。邪說誣民。本干例禁。如該御史所奏蘇州府城西十里楞伽山。土人立五通祠。前於康熙年間毀祠踣像。日久禁弛。賽賽如故。及女巫假託神語。按簿還願。陋習相沿。不獨蘇州一府為然。不可不嚴行飭禁。著孫玉庭韓文綺卽飭所屬州縣。將境內五通等淫祠。概行撤毀。毋任愚民

賽賽結會。其女巫巫等。並著地方官出示曉諭。責令該家長等嚴加管束。其一切創立邪說。哄誘愚民。燒香斂錢等事。隨時訪拏。嚴加懲治。以維風俗而正人心。○五年諭。朱士彥奏請禁訟戶抗糧。以端士習。一措士為四民之首。自宜恪守臥碑。束身自愛。况錢漕係惟正之供。定例貧生交納錢糧。以次年二月四月為率。較平民展至數月。待士已為優厚。豈容積年抗欠。如該學政所奏。浙江杭嘉湖三府。近來錢糧逋欠甚多。俱係生監上控有案。包漕開漕。抗不完納。地方官不能催徵。加以訟戶名目。與訟師訟棍無異。該生等恬不為怪。於士習大有關係。不可

不嚴行懲辦。該學政甫經到任。即出示曉諭。甚屬認真。著該撫程含章會同該學政實力整頓。毋許再有訟戶名目。自本年為始。如仍有不肖生監。恃符抗欠。逾限不完。著即行褫革。嚴辦示懲。毋稍姑息。○八年

諭。蒙古地方風氣。素來淳樸。止知練習弓馬。從不競尚奢靡。近日習為逸樂。漸染澆漓。若不亟加整飭。恐致忘其本務。各旗札薩克。有管轄旗務之責。自宜認真辦事。克勤乃職。即閒散蒙古。亦應以騎射為重。不但扮演梨園之事。有干例禁。其一切浮華氣習。均當力為肅除。庶不失淳樸舊俗。各王公札薩克等。其懍遵毋

替。無負朕諄諄訓誡至意。○又

諭。富俊奏黜奢尚儉以維風化一摺。厚生之道。首在崇儉。惟承平日久。生物滋豐。以致踵事增華。風俗日形奢靡。朕御極之初。曾經降旨。諄諄垂誡。期於返樸還淳。乃奉行不力。日久仍成具文。如富俊所奏。近日京師外省。風氣競尚浮夸。較前更甚。誠不可不防其漸。查官員軍民人等。一切冠履服飾。以及冠婚喪祭等事。載在會典。具有品級等差。因卷帙浩繁。民間不能家有其書。致使爭相誇耀。積慣成習。視為固然。於風俗人心。大有關係。著內外各衙門。將民間應用服色。及婚喪儀制。悉照會典所

載刊刻簡明規條。編行示諭。務使家喻戶曉。嗣後各實力祇遵。毋再蹈侈靡故習。以副朕崇儉黜奢之至意。○十二年諭。自古帝王覺世牖民。止此君臣父子之經。禮義廉恥之訓。朝廷以是為修明。師儒以是為講習。無二教也。自邪說誣民。創立教名。輾轉傳習。流毒無窮。一經破案。貽害多人。求福轉以速禍。深堪憫惻。各督撫務須剴切徧諭愚民。俾知迪吉。逆凶。各安耕鑿。毋再結會傳徒。致干罪戾。○又

諭。御史梁夢涵奏海濱搶船惡習。請旨嚴行飭禁。一摺。山東榮成縣切近海濱。東南北三面均有海口數處。浙江閩廣等省商船貿易來往。偶遇大風。商船在洋

內毀壞。商人全行淹沒。一切雜貨。隨浪漂至海邊。此
係無主之物。近海居民。爭相檢取。例所不禁。惟有船
已近岸。忽遭大風。吹至淺灘者。俗謂之搶灘船。此等
船隻。雖不能毫無損傷。而商人俱在。貨物俱全。乃近
海居民。一聞有搶灘之船。遂蜂擁而來。將船隻硬行
劈破。一切貨物銀錢船板等件。霎時搶盡。此種惡習。
斷不可長。著山東巡撫嚴飭地方官。出示曉諭。如有
仍前貪利故違者。嚴拏重懲。並恭錄諭旨。懸示海濱。
俾無知愚民。咸知懍遵。庶違商不至受累。而民風可
期挽回。再地方偶遇荒歲。本地棍徒。往往糾眾向殷

實之家。借貸穀糧。不允所請。則肆意搶奪。亦不可不防其漸。著一併飭禁。以挽澆風。○十四年

論。御史劉誼奏請嚴禁越境燒香一得。前據步軍統領衙門。擊獲形迹可疑人犯。經刑部訊係直隸河南山東進京燒香之人。此等無知愚民。不明福善禍淫之理。以為敬神進香。可邀福庇。即難保無姦究之徒。從中煽惑。為會首者。藉此斂錢聚眾。必致滋蔓難圖。實不可不防其漸。業經獲案。自難置而不問。朕思懲之於後。不若禁之於先。著直隸山東河南各督撫。轉飭地方官。出示剴切曉諭該民人等。各安本業。即可受福。斷不許結隊成羣。

越境來京燒香。如仍蹈前轍。即將為首之人。嚴拏究辦。總責成該地方官。平日善為化導。端其趨嚮。齊其心志。庶幾經正民興。日臻上理。朕實有厚望焉。○又

諭御史俞焜奏請申明例禁。以培風俗一摺。自來民俗之淳澆。由於平時之漸染。國家型方訓俗。必將孝弟忠信禮義廉恥大為之防。方可正人心而維風俗。如該御史所奏。近來傳奇演義等書。踵事翻新。詞多俚鄙。其始不過市井之徒。樂於觀覽。甚至兒童婦女。莫不厭聞而習見之。以蕩佚為風流。以強梁為雄傑。以佻薄為能事。以穢褻為常談。復有假託誣妄。創為符

呪禳厭等術。蠢愚無識。易為黃鼓刑訟之日繁。姦盜之日熾。未必不由於此。嗣後各直省督撫及府尹等。嚴飭地方官實力稽查。如有坊肆刊刻及租賃各鋪。一切淫書小說。務須捺取板書。盡行銷毀。庶幾經正民興。奇衰胥靖。朕實有厚望焉。○十五年

諭。御史俞焜奏嚴覈優劣以端士習一摺。從來民風之醇樸。由於士習之端謹。凡有教士之責者。不徒課以文藝。務在敦崇實行。嚴為旌別。以樹風聲。若如該御史所奏。近來各地方官。於貢舉生員。並不隨時稽查。教官舉報優行。人數日增。不無冒濫。其有素行不端。

者。類皆徇隱不報。刁劣之徒。肆無顧忌。往往出入公庭。句串胥吏。或以他人漕糧。出名包攬。或以不干己事。聯名訟訐。逞筆舌以玩法。恃衣頂為護符。甚至欺壓鄉閭。挾制官長。犯法滋事。日積愈多。於風俗人心。大有關係。不可不嚴行甄覈。著各直省督撫。府尹學政。嚴飭該地方官。暨各教職。務須隨時訓誡。認真稽查。舉優者毋徇虛名。報劣者毋許姑息。儻仍瞻徇隱匿。致釀事端。即將各該地方官及教職。從嚴叅辦。決不寬貸。○十六年

諭。盛京為根本重地。風俗素稱淳樸。前因有演戲賭博

等惡習。屢經降旨。飭令該將軍等實力嚴禁。力挽頹風。因思陪都地方。近因五方輻輳。難免漸染紛華。演戲雖經禁革。難保必無賭博之習。尤為人心風俗之害。甚至服飾競為新奇。耳濡目染。勢所必至。著該將軍府尹等。隨時整頓。實力稽查。戲班賭棍。驅逐嚴拏。其有服飾新奇。不合舊式者。立即嚴行禁止。以期還淳返樸。力挽頹風。○又

諭。向來投遞匿名文書。告言人罪。拾獲者照例銷毀。原所以戢姦宄而防傾陷。近來各省士民。習染漸深。往往編造歌謠。妄將該管各官。肆行詆毀。冀圖洩忿。迨

經簡派大臣前往。或交督撫大吏秉公查訪。所指各款。多屬子虛。而為所指斥者。不但聲名頓減。且牽涉多人。紛紛提究。受累已不待言。揆厥由來。大率懷挾私讎。妄希控累。又慮出名控告。一經審虛。即照誣捏治罪。是以情變百出。作為歌詞。隱匿姓名。巧相污蔑。即審明實無其事。全係捕風捉影之談。亦得置身局外。無從究治其罪。是此等鬼蜮伎倆。實與匿名揭帖無異。於風俗人心。大有關係。不可不嚴行查禁。嗣後各直省大吏。遇有傳播歌謠。指斥公事者。惟當虛衷體訪。嚴密根追。並究明編自何人。一經得有捏寫主

名。即行密拏到案。訊明平日有何讎怨。照例嚴行懲治。毋稍寬縱。以省株累而挽頽風。○又

諭鴻臚寺少卿葉紹本奏閩廣械鬪之風未戢。推求源本。嚴除弊端。以靖地方而安黎庶。一摺。閩廣漳泉惠潮一帶居民。每以田土微嫌。睚眦細故。持械爭鬪。輒釀巨案。雖嚴立科條。力求整頓。此風總未止息。著鍾祥鄧廷楨等。將摺內所陳。悉心妥議具奏。○十八年諭前據御史步際桐奏山東章邱等縣杖槎白雲二山廟會。有會集教徒情事。降旨令經額布查辦。茲據該撫奏稱。查明章邱縣杖槎山。有孤石大夫廟。高廣僅

三尺餘。旁止草房數間。不堪容止人衆。淄川縣白雲山有。

泰山行宮等廟。亦係民間香火社會。習俗相沿。敬神祈福。均無聚衆傳徒。自為頭目等情。愚民習教傳徒。最為風俗人心之害。自應嚴行查辦。至民間賽會燒香。與倡立教會。雖屬有聞。然各廟會期。聚集人衆。難保不負良莠混淆。著該撫即督飭各州縣。嚴加查訪。隨時飭禁。其孤石大夫廟。並著即行拆毀。以杜淆惑。而正風俗。○又

諭御史萬超奏請嚴禁棍徒引誘旗民一摺。向來八旗

風俗。涇樸務本。一切浮奢遊戲。概行革除。若如所奏。近有無賴棍徒。施舍路燈。演放花盒。黃夜聚衆。挑燈擊鼓。並奇裝異服。馳馬跑車。甚且招引婦女。乘閒姦拐。殊為風俗人心之害。不可不嚴行禁止。著步軍統領衙門。順天府五城。一面出示嚴禁。一面密飭所屬。隨時隨地認真查拏。無論何項人員。犯有前項情事。立即拏究。應責懲者。即予責懲。應治罪者。分別治罪。儻查拏不力。致有徇情隱庇等事。經朕別有訪聞。或被人叅奏。朕惟該管大臣及巡城各科道是問。毋謂言之不豫也。○又

諭朕恭閱

皇考仁宗睿皇帝實錄。嘉慶九年二月內欽奉

諭旨。鑲黃旗都統。查出該旗漢軍秀女內有纏足者。並各該秀女衣袖寬大。竟如漢人裝飾。著各該旗嚴行曉示禁止等因。欽此。仰見

皇考訓誡周詳。允宜永遠遵守。今相沿日久。恐奉行不力。又復視為具文。或致再蹈此等習氣。不可不重申例禁。加之整飭。我朝服飾。本有定制。不惟愛惜物力。亦取便於作事。若如近來旗人婦女。往往衣袖寬大。甚至一事不可為。而其費亦數倍於前。總由競尚奢

靡所至。至仿效漢人纏足。尤屬違制。此等惡習。大約內務府漢軍及屯居漢軍旗人。俱所不免。於國俗人心。關係甚鉅。著八旗滿洲蒙古漢軍都統副都統等。隨時詳查。如有衣袖任意寬大。及如漢人纏足。有違定制者。一經查出。即將家長指名叅奏。照違制例治罪。儻經訓諭之後。仍復因循從事。不能實力奉行。將來經朕查出。或被入糾叅。定將該旗都統章京等。一併嚴懲。決不寬貸。○十九年

諭前據兩江總督陳鏊等奏請飭下儒臣敬謹推闡聖諭廣訓內黜異端以崇正學一條。擬撰有韻之文。頒

發各省。當經降旨。著翰林院敬謹擬撰。茲據掌院學士等。進呈四言韻文一篇。候朕欽定。朕詳加披閱。足以闡明。

聖訓。啟迪愚蒙。著禮部即頒行各直省學政。恭書刊刻。徧頒鄉塾。俾民間童年誦習。激發良知。涵育薰陶。風俗蒸蒸日上。朕實有厚望焉。

欽定敬聞

聖諭廣訓。黜異端。以崇正學。四言韻文。

惟天生民。異質同性。畀以五常。統乎百行。自聖及凡。無邪有正。本體既明。趨嚮乃定。惟聖覺世。振頑啟愚。

防以刑政。迪以詩書。雷霆傲戶。日月照衢。提撕引掖。惟善之驅。緬思古昔。俗美化醇。豆觴知義。箕帚明倫。以忠於上。以孝於親。里因仁美。鄰以德薰。蓋惟先民。正學是尚。戶謹師承。家遵蒙養。行不履邪。言不涉妄。聖教既昌。皇風斯暢。聿有二氏。曰老曰釋。老主清淨。釋宗寂滅。為教雖殊。其指則一。今之異端。乃襲其說。嗟彼異端。何獨非民。不知父子。不知君臣。若飲狂藥。如墮迷津。離經畔道。與匪為鄰。匪之不除。邪說競作。偽託師巫。妄言禍福。結會傳徒。糾盟黨惡。使我良民。受其愚惑。惟民之愚。見異思遷。謂可成佛。謂可昇仙。

教之不悟。信之愈堅。不惜軀命。無論金錢。嗟爾之軀。
生自父母。望爾承先。望爾啟後。達固為榮。窮亦可守。
奈何不肖。受其脅誘。嗟爾之財。辛苦所餘。累非朝夕。
積自錙銖。衣食所賴。緩急是需。奈何被惑。罄其蓄儲。
今為爾告。爾其敬聽。自來百邪。不敵一正。見暝雪消。
遇霜草隕。身敗名墮。曾不轉瞬。不見異端。男女同室。
廉恥道亡。綱常理息。如彼禽獸。豈容天日。一旦伏誅。
悔之無及。不見異端。如素念經。愚我黔首。亂我儒衿。
生為民蠹。死受國刑。殃禍不救。祈祝無靈。不見異端。
創立名號。敢肆譎張。自外覆幬。翦鴉於林。磔鼠在道。

曾不崇朝。首領莫保。前車可鑒。覆轍當思。何習其教。
更拜為師。念此蠢蠢。哀我蚩蚩。狂瀾不返。疇其拯之。
乃飭疆吏。乃命守土。為爾去莠。為爾除蠹。殄此虺蛇。
投彼豺虎。一做迷途。同歸覺路。自今庶民。各守爾義。
農服耕耘。士脩孝弟。商阜其財。工勤其藝。莫作非為。
永保毋替。更告爾兵。武藝為先。冠不在美。衣不在鮮。
武勇既備。禮讓並嫻。毋蹈非分。永守毋愆。矧今盛世。
何生不育。化及昆蟲。澤被草木。飽煖有資。俯仰具足。
幸生其時。太平可樂。毋干國典。毋犯王章。各守本業。
共享平康。秋田息蜡。春社烹羊。人其永壽。天亦降祥。

○又

諭。嗣後內外臣工。總當守分勵品。斷不准藉師生稱謂。以為攀援干進之階。至部院大臣。及各省督撫等。尤當正己率屬。以人事君。遇有藉端干謁者。即行面為屏斥。概不准因遞詞卑禮。稍事姑容。庶屬吏共知敦品。以杜奔競而肅官方。○三十年十二月

諭。陸建瀛奏請崇正學以黜邪教等語。近來邪教流傳。蔓延各省。始不過燒香斂錢。煽惑愚民。漸至聚眾滋事。總因地方官平日化導無方。民間父兄師長。又不能隨時訓迪。俾頽蒙服教畏刑。不致為邪說所惑。我

皇考曾命儒臣恭聞

聖諭廣訓。黜異端。以崇正學。一條。編撰四言韻文。頒行各省。啟發愚氓。朕思性理諸書。均為導民正軌。著各直省督撫。會同各該學政。轉飭地方官。及各學教官。於書院家塾。教授生徒。均令以

御纂性理精義。

聖諭廣訓。為課讀講習之要。使之家喻戶曉。禮義廉恥。油然而生。斯邪教不禁而自化。經正民興。庶收實效。各該督撫等。務當實力奉行。毋得視為迂闊具文。日久生懈。則風俗人心。蒸蒸日上。朕實有厚望焉。咸

豐二年

諭御史張煒奏請嚴禁演戲奢靡積習等語。京師五城向有戲園戲莊歌舞昇平。歲時燕集。原為例所不禁。惟相沿日久。競尚奢華。如該御史所奏。或添夜唱。或列女座。燕會飲饌。日侈一日。殊非崇儉黜奢之道。至所演各劇。原為勸善懲惡。俾知觀感。若靡曼之音。鬪狠之技。長姦誨盜。流弊滋多。於風俗人心。更有關繫。現在國服將除。必應及早嚴禁。著步軍統領衙門五城御史。先期刊示曉諭。屆時認真查辦。如仍蹈前項弊端。即將開設園莊之人。嚴拏懲辦。以振靡俗而除

積習。○又

諭御史倫惠奏京西妙峯山廟宇。每於夏秋二季。燒香人衆。有無賴之徒。裝演雜劇。名曰走會。請飭嚴禁等語。鄉民春秋報賽。詣廟燒香。原為例所不禁。若如所奏。匪徒以走會為名。裝演雜劇。以致男女混淆。於風化殊有關係。著步軍統領衙門順天府及西北城各御史。先期出示曉諭。如有前項匪徒。即行拏究懲辦。仍不准差役人等。藉端擾累。○三年

諭毓書奏外藩蒙古人等。沾染漢人習氣。漸失根本。請旨嚴行禁止一摺。蒙古地方。素性淳樸。不事浮飾。近

來蒙古人起用漢名。又學習漢字文藝。殊失舊制。茲據毓書奏稱。蒙古人詞訟亦用漢字。更屬非是。若不嚴行禁止。斷然不可。著理藩院通行曉諭。內外各札薩克部落。嗣後凡蒙古人。務當學習蒙文。不可任令學習漢字。以副朕敦厚蒙古。涵樸風俗之至意。○八年

年

諭。翁同書奏。訪聞徽甯等府愚民。傳習花會。請飭嚴禁。一摺。據稱。徽甯等府。近來傳習花會。棚廠林立。刀矛雜陳。局賭輸贏。土豪惡棍。因而漁利。猾吏姦胥。為之隱庇。愚民墮其術中。敗產傾家。甚至釀成命案。大為

風俗人心之害。業經該撫嚴飭查拏。出示禁止。惟皖南地方。距省較遠。該撫稽查難周。並恐浙江壤地毗連。不免沾染惡習。著張芾胡興仁通飭各府縣一體嚴禁。實力訪拏。並責令地保舉報。如有劣紳包庇惡棍把持。及地保等通同容隱。一併從重治罪。該地方官。如敢視為具文。別經發覺。即著從嚴叅劾。以挽澆風。○又

諭。玉明等奏。久旱得雨。商民呈請演劇酬神一摺。奉天為陪都重地。道光年間。曾奉

諭旨。不容戲班聚集。致趨侈靡。茲據該將軍等奏。商民

等以酬神祝嘏。呈請演戲。自應俯順輿情。嗣後該省地方。遇有祈雨謝秋祝嘏等事。准該商民等演戲三五日。仍報明地方官。俾示限制。此外省城以內大小文武官員。以及商民人等。仍恪遵前奉

諭旨。概不准尋常演戲。以敦樸素而杜奢華。○十一年

十一月

諭前因粵匪藉教滋事。以致鄉曲愚民。惑於異說。自罹法網。我

皇考大行皇帝。憫念顛愚。罔知覺悟。特親書

皇祖宣宗成皇帝欽定四言韻文。

命武英殿勒石搨印。頒發天下。各直省將軍督撫府尹
學政。督飭地方文武官員。及各學教官。欽遵宣布。並
令官紳士庶。摹勒刊刻。以廣流傳。直省大小官吏。自
必敬謹奉行。第恐日久。視為具文。奚以正人心而厚
風俗。現在各省會教各匪。尚未寢息。亟宜廣為化導。
以儆愚頑。著各直省將軍督撫等。恪遵

皇考諭旨。將前次刊刻韻文。責成各官紳。於學宮書院
認真宣講。並選各學生員。分赴城市鄉鎮。家喻戶曉。
俾共知名教之可樂。一切誕妄不經之說。無從煽誘。
正人心而閉邪說。庶蒸蒸日上。理也。其每月朔

望宣讀

聖諭廣訓。仍照例行。將此通諭知之。○同治二年
諭。候補三品京堂朱蘭奏。請飭官常以勵風俗。一摺。國
家設官分職。所以宣上德而通下情。民俗之厚薄。每
視官常為之表率。近來州縣等官。遇有蠲緩恩旨。輒
敢延閣多時。始行張貼。騰黃。又僅於城市張貼。鄉僻
未能周知。其殷戶已先期輸納。餘則畏差役之騷擾。
依期畢輸。若稍遲數日。則一分一釐之錢糧。必加一
二三兩之催費。是朝廷蠲租賜復之恩。止為官吏分
肥之地。官恐生監上控。略取餘平與之。以閒執其口。

士習之壞。民心之瀉。皆由於此。由是劣紳蠹吏莠民。互相牟利。或私墾湖田。或起議團租。甚至持械逼官。斂錢入局。始則官非其有。而取諸民。繼則民非其有。而奪諸官。利端一啟。上下交征。為患何可勝言。其中一二廉潔愛民之吏。又因怕幅無華。不肯隨俗波靡。或為同官讒間。或為大吏所抑。朝廷視民如傷。勤求司牧。而督撫大吏。乃惟諂媚利口。培克剝削之員。是喜欲吏治之肅。斯民之治。其可得乎。嗣後各省督撫大吏。務各整躬率屬。獎拔循良。必令久於其任。嚴懲貪墨。毋或徇庇其私。庶閭閻疾苦。可以上陳。國家德

澤無不下究。民氣日蘇。風俗日厚。實有厚望焉。○又
諭。前據羅悖衍奏廣東省賭風最盛。劉長佑下車伊始。
即將白鴿票花會並闡姓番攤各賭博先行禁絕。號
令一新。百姓亦樂於從命。現在該督離任。恐各種賭
博。故態復萌。請飭晏端書一體嚴禁等語。賭博為害
閭閻。往往破家蕩產。弱者轉於溝壑。强者流為盜賊。
不可不嚴行查禁。著晏端書督飭所屬出示嚴禁。以
裕民生而端風化。○五年

諭。羅悖衍奏請飭士民速葬親柩等語。子孫久淹親柩
不葬。本干例禁。近來習俗相沿。或因拘泥風水。或因

貧窶乏資。遂將親柩停留。久不安葬。問心其何以安。著各該省督撫。飭令所屬各州縣。廣為勸諭。務使士民咸知速葬之義。不得藉故淹留。致干罪戾。○又

諭崇厚奏請飭盛京採訪節孝等語。陪京民風敦厚。為四方觀感所資。所屬各州縣旗民人等。以節孝著稱者。諒不乏人。若如該侍郎所奏。監生房佩宛純何振鐸妻舒氏。均未查明旌表。恐此外湮沒不彰者。正復不少。即著盛京禮部侍郎奉天府府尹府丞。督飭旗民地方官。將該省孝子節婦。有事實可據者。隨時詳加採訪。奏請旌表。以維風化。毋稍冒濫。其例應具題

咨部之案。即著照例辦理。不得率行奏請。○又

諭。御史林式恭奏民間溺女積習未除。請嚴行禁止。一
摺。民間溺女。乾隆年間。部議照故殺子孫律治罪。例
禁甚嚴。乃據該御史奏。近來廣東福建浙江山西等
省。仍有溺女之風。恐他省亦所不免。實屬傷天地之
和。若不嚴行禁止。何以挽全民命。著各直省督撫。董
飭所屬地方官。出示嚴禁。並責令各州縣。勸諭富紳。
廣設育嬰處所。妥為收養。俾無力貧民。不至因生計
艱難。再蹈惡習。儻仍不知悔改。即治以應得之罪。毋
稍姑貸。○七年

諭丁日昌奏設局刊刻收令各書一摺。州縣為親民之官。地方之安危繫之。丁日昌現擬編刊收令各書。頒發所屬。即著實力舉行。俾各州縣得所效法。其小學經史等編。有裨學校者。並著陸續刊刻。廣為流布。至邪說傳奇。為風俗人心之害。自應嚴行禁止。著各省督撫。飭屬一體查禁焚毀。不准坊肆售賣。以端士習而正民心。○又

諭錢寶廉奏請嚴禁火葬一摺。火葬之習。久干例禁。近來浙江嘉湖等府。尚有此弊。若如該學士所奏。實於地方人心風俗。大有關係。亟宜嚴禁。以挽頽風。著浙

江巡撫出示曉諭。申明例禁。並恐他省沿此陋習。著各省督撫。通飭所屬州縣。一併嚴禁。如有仍前火葬者。即行按律治罪。其嘉興府向有惡棍阻葬等事。並著李瀚章飭令各州縣從嚴懲辦。以儆刁頑。○八年諭。御史錫光奏請嚴禁五城寺院演劇。招搖婦女入廟。以端風化。一摺。寺院庵觀。不准婦女進內燒香。例禁綦嚴。近來奉行不力。以致京城地面。竟有寺院開場演戲。藉端斂錢。職官眷屬。亦多前往。城內隆福寺。護國寺。開廟之期。婦女亦復結隊游玩。實屬有關風化。著步軍統領衙門。順天府五城。出示曉諭。嚴切稽查。

遇有前項弊端。即將該廟僧尼人等。從重懲辦。以挽頽風。○九年

諭御史秀文奏請嚴禁內城賣戲一摺。京師內城地面。向不准設立戲園。近日東四牌樓。竟有泰華茶軒。隆福寺胡同。竟有景泰茶園。登臺演戲。並於齋戒忌辰日期。公然演唱。實屬有干例禁。著步軍統領衙門。嚴行禁止。儻敢故違。即行從嚴懲辦。○又

諭御史劉瑞祺奏請崇儉德以維風化一摺。方今物力艱難。民生彫敝。尤宜黜華崇實。力挽頽風。屢經明降諭旨。期與中外臣民。力除浮靡。諒已共見共聞。茲覽

該御史所奏各情。尤宜倍加儆惕。嗣後當益求撙節。為天下先。中外臣民亦應一體從儉戒奢。毋蹈從前積習。以副朝廷敦崇節儉至意。○十年

諭御史劉瑞祺奏請飭銷毀小說書版一摺。坊本小說例禁綦嚴。近來各省書肆竟敢違禁刊刻公然售賣。於風俗人心殊有關繫。亟應嚴行查禁。著各直省督撫府尹飭屬查明應禁各書。嚴切曉示。將書版全行收毀。不准再行編造刊印。亦不得任聽吏胥藉端按查致涉騷擾。○又

諭翰林院代奏編修吳鴻恩敬陳管見各摺片。不無可

採整飭風俗為地方之要務。乃各省莠民竟有傳習
鐙花教白蓮教青林教諸名目。盡惑愚民。亟應隨時
查禁。有犯必懲。士子身列膠庠。尤當恪遵軌範。著各
直省督撫學政。責成各學教官。認真訓誡。如有不遵
約束者。即行從嚴懲治。○光緒二年議准。川省訟棍
多係貢監文武生。唆架扛幫。大為民害。嗣後由
學政嚴飭辦理。教官及州縣等。如有徇匿者。照
例議處。○十一年

諭僧道造言惑眾。及婦女入廟燒香。均干例禁。嗣後
著該管地方官。嚴行禁止。其餘京城內外各寺觀。

如有燒香賽會與此相類者亦著隨時查禁以端
風化而正人心

欽定大清會典事例卷四百一

禮部

風教

禁止貢獻

禁止貢獻。雍正十三年九月

諭。各省督撫大臣。有進貢方物之禮。昨福建督撫齋到。閩省果品。乃照例進獻於

皇考之前者。朕不便發回。已交所司敬謹收貯。以備
几筵供饗之用。若遠省大臣進貢

皇考之物。已齋送在途者。准其赴京交奏事官員轉奏。
其各省照例進朕之物。概行停止。雖食物果品。亦不

許進。俟三年之後。候朕再降諭旨。著通行傳諭各省督撫大臣一體遵行。○又

諭朕前降旨。三年之內。不准各省督撫進獻土產。若有進獻

皇考之物。已在途次者。准其進呈。昨江南總督趙宏恩貢獻食物器具。乃八月中旬齋發。在

龍馭上賓之先。朕不忍遣回。謹留為

几筵陳設之用。恐他省不知情由。特行曉諭。嗣後凡有進朕之物。即齋送到京。奏事官員亦不准接受轉奏。俟三年之後。朕再降旨。朕仰承

聖祖

皇考福蔭。凡服御器用之屬。何一不備。取之宮中而有餘。正不待四方之入貢也。在諸臣各懷尊君親上之心。固欲藉物產以伸其誠敬。然此貢獻之物。豈能自備於家。而不取資於民力乎。是朕多受一次貢獻。即諸臣多費一次經營。諸臣多費一次經營。即百姓多費一次供應。朕實不忍以無益妨有益。各省督撫諸臣。果有愛戴之心。惟當體朕子惠元元之意。凡一絲一粟。皆思為人民留其有餘。使之家給人足。則勝如朕之自受矣。○乾隆元年

諭。聞長江一帶。向有貢獻鱔魚之例。至康熙年間停止。因而地方改為折價。向網戶徵收。解充地方公用。乃歷年既久。或網戶改業。或移徙他方。展轉牽連。又加胥吏藉端苛索。遂致沿江捕魚之人。代受追呼之累。朕思當年

聖祖仁皇帝停止貢鮮。乃愛惜民力之至意。何用此些須折價。煩擾小民。著該督撫查明豁免。永著為例。

三年

諭。各省督撫。向來有進貢方物之例。朕御極之初。即降諭旨。令三年之內。停止進貢。俟即吉後。再行請旨。數

月以來。雖各省督撫。尚未舉行。但朕思此事甚屬無益。蓋進貢之意。不過曰藉此以聯上下之情耳。殊不知君臣之間。惟在誠意相孚。不以虛文相尚。如為督撫者。果能以國計民生為務。公爾忘私。國爾忘家。則一德一心。朕必加意獎賞。若不知務此。而徒以貢獻方物為聯上下之情。則早已見輕於朕矣。且朕現在諭令督撫等。無得收受屬員土儀。誠以督撫取之屬吏。屬吏未必不取之民間。目前所受雖微。久之必滋流弊。若進貢方物。雖云督撫自行製辦。而輾轉購買。豈能無累閭閻。是所當行禁止者。惟織造關差鹽差。

等官。進貢物件。向係動用公項製買。以備賞賜之用。與百姓無涉。不在禁例。其督撫有牧民之責者。著概行停止貢獻。二十年

諭。朕近於幾暇。恭讀

皇考世宗憲皇帝諭旨。禁止貢獻。嘗諄切訓誡。至再至三。而逆犯查嗣庭日記。有進硯頭瓶湖筆一事。形諸記載。可見人心險薄。何所不至。益以仰見

皇考聖明洞照。防微杜漸之淵衷。所以維持世道者。至深且遠。因憶御極以來。雖曾禁臣工貢獻。而朕四十壽辰。臣工於方貢外。亦有進玩器書畫慶祝者。在督

撫諸臣受朕委任。若因辦覓貢物。而使屬員得以乘機迎合。或貽累於富戶商人。稍有人心者。當不出此。設令有之。亦斷不能逃朕洞鑒。然僉邪好事之徒。未免因此妄生擬議。構造浮言。是亦查嗣庭者流耳。當此化日光天之下。雖伊等技無所施。而究不若概行禁絕者之為善也。嗣後廷臣督撫。其毋有所獻。又

諭。今日召對西安布政使劉藻。據奏盧焯在西安巡撫任內。遇有進貢方物。止量給薄值。實皆派辦。及調任湖北。向借庫銀一千兩。未曾應付等語。盧焯乃獲罪廢斥之員。朕念伊尚係舊人。加恩錄用。適因一時乏

人。今以京卿署理撫篆。旋復實授。理宜感激朕恩。勉圖報效。不意其卑鄙性成。不知悛改。尚復如此。督撫進貢一事。朕屢經降旨停止。概不得有所進獻。其各省方物。不過柑茗香罽之屬。以備賚予。此則伊古有之。不在禁例。從前

皇考世宗憲皇帝時。覈定督撫養廉。洞悉下情。是以從優賞給。諭旨中亦屢及此。此與發價令伊等承買何異。伊等每年所貢方物幾何。原可從容備辦。即不備辦。亦不强也。乃以此為囊橐中物。專已自封。而又藉進獻之名。派累所屬。為漁利計。寧屬員之養廉。顧為

資助督撫設耶。因問及陳宏謀。據劉藻云。伊辦貢皆
出自養廉。如數給發。是可見鄙吝之與自好。存乎其
人。嗣後督撫各宜自量。如以養廉自辦。毫無累及所
屬。循例可也。藉曰不能。則如勿進。若如盧焯及近日
恆丈之藉口自肥。則斷不可。督撫之優劣。自由功績。
於進獻毫無干涉。此亦天下所共知者。而旁人之指
摘議論。必不可掩。彼受派累者。不且怨及君上耶。至
庫項絲毫均關國帑。乃竟欲私相授受。公然向藩司
借貸。其罪更不待言矣。盧焯深負朕恩。著革職發往
巴里坤效力贖罪。○二十二年

諭。前據郭一裕參奏恆丈各款。特令劉統勳會同定長查辦。今據奏到買金等事屬實。業已降旨。將恆丈革職拏問。但聞供詞內稱購金情節。實緣欲購備方物進貢。商之郭一裕。據云滇省惟金較貴重。我擬製造金手鑪四箇進貢。因令標員明桂向巡撫衙門領取鑪樣。購金製備等語。臣工貢獻。前曾屢經降旨。概行禁止。即督撫所貢方物。不過茗柑食品等物。以備賞賜。或遇國家大慶。間有進書畫玩器慶祝。酌留一二。亦以通上下之情而已。從未有以金器進貢者。但恆丈果以金器進到。亦必申飭發回。况內府何所不有。

寧藉此。芟芟金器為耶。而乃藉詞勒派屬員。短價冀圖餘潤。以致喧傳合省。殊玷官箴。然既有以進貢為口實者。嗣後各省督撫。除食品外。概不得絲毫貢獻。違者以違制論。至恆丈。歷任封疆。豈當惜於事理。其在公正大臣。一聞郭一裕進貢金鑪之語。即應據實參奏。乃不惟不奏。更尤而效之。反被所欺。是何愚之甚耶。但郭一裕既以進貢金器。慫恿總督。隨以購金參奏。是復何心。此雖恆丈一面之詞。亦不可不根究明悉。著劉統勳定長將此情節。逐一秉公研訊。至恆丈家人。或偶爾需索。尚可諉為耳目不周。乃金銀贓

物計值累千。是其罔利營私。稔惡盈貫。何得僅以失察為詞。著一併嚴審具奏。○二十五年

諭。今年為朕五十誕辰。已降旨臣工等。不得以合詞慶祝。踵事繁文。至督撫等各進土宜方物。朕不過以其封疆大吏。藉聯上下之情。未可徑斥。若藩臬兩司。其位次本不宜貢獻。前庚午年早經傳旨飭禁。惟托庸等數人。以兼管關差織造。故不在遣卻之列。乃今日調任甘肅布政使許松佶。具摺進貢。微特不悉朕意。於體制亦屬冒昧。已飭奏事處發還。恐直省各員未能徧曉。效尤之習。不可不防其漸。並將此明白宣諭。

知之。○三十一年

諭督撫大吏。向不令其歲時進奉。屢降諭旨甚明。其有以土物充貢者。如紙筆香扇等數。尚可留備賞賜之用。亦藉以聯上下之情。從不使其購珍奇以致糜費。此中外臣工所共知者。昨廣東巡撫王檢貢物內有小珍珠一項。甚為不取。夫珠寶飢不可食。寒不可衣。於實用有何裨益。業令奏事處發還。恐各督撫尚有未能盡喻朕意者。著將此明白通諭知之。○三十六

年

諭。本年恭逢

聖母皇太后八旬萬壽。慶洽敷天。直省督撫。多效芹曝之私。以達下情而申祝。

擬。自屬禮所宜然。乃諸臣中進呈貢物。未免臚列太多。甚有以金品充飾。過滋糜費者。在諸臣備物抒誠。諒不至累及民間。取資下屬。必出自養廉購辦。但養廉一項。乃國家優恤臣工。厚予祿糈。以資辦公之用。若悉以備物進獻。則於衙門公事用度。轉致缺乏。且此次貢物。竟有浮於歲入養廉之外者。似此踵事增華。仰惟

皇太后九旬百齡大慶。

慈壽無疆。諸臣貢物。厯次遞增。伊於何底。既非所以體
聖母敷錫。逮下之慈懷。亦不能副朕推

恩體恤之至意。即如朕上年六旬誕辰。諸臣所進。不過
酌留一二。聯上下之情。並無取乎誇多競勝。從前疊
經降旨甚明。各督撫等嗣後務宜恪遵朕諭。毋再從
事靡文。果能各盡職守。實心宣力。共佐昇平之治。朕
之所寶。孰大於是。著將此通行飭諭知之。○三十八
年

諭朕於祇謁

奉陵禮成後。便道閱視河工。恭奉

皇太后安輿。巡幸天津。距京師不過數程。較之熱河道里尤近。非若巡幸他省可比。如河東總河及山東河南二省巡撫。以壤地相接。就近奏請覲光。原為合理。即如鹽政織造等呈進備賞之物。亦尚有因。至各省督撫等差人齎摺請安。已可不必。乃督撫等竟相率進獻方物。甚屬無謂。念其遠道而來。已費跋涉。難以概行屏卻。因量收食物數種。以備隨營賚予。但封疆大臣。惟當善體朕心。似此非禮之禮。實所不取。嗣後凡朕巡幸近畿。各省督撫務恪遵此旨。不得復有進獻。○四十一年

諭。朕前歲閱視河工。臨莅天津。督撫等有遠道進貢者。曾降旨通諭飭禁。茲因平定兩金川。巡幸山東。告成。闕里。各省督撫呈遞貢摺者甚多。殊屬無謂。朕鑿輅所經。如本省大吏呈進方物。尚非過分。即各鹽政關差織造。閒進紬緞等項。以備賞賚。亦尚有因。乃各省督撫。竟相率遠致皮張緞疋等物。為誇多鬪靡之舉。朕非但不喜。且覺其煩瀆可憎。封疆大臣。朕委任以地方政務。惟視奉職程。其殿最。豈因進貢。衡其短長。伊等何不知善體朕意。冒昧若此乎。所有此次各督撫呈進之物。已諭令奏事處。概行擲還。仍著傳旨申

飭嗣後遇朕巡幸務恪遵此諭毋得復有進獻。又諭向來各省督撫例進方物如雲南產雲石福建柑橘荔支之類隨所產陳獻仍不外乎任土作貢之義乃閱時既久督撫等踵事增華即有購覓古玩充貢者其始因恭逢

皇太后七旬八旬萬壽大慶及朕六旬萬壽各督撫備物以申忱悃尚未過分伊等遂習焉不察於每歲萬壽年節亦一例呈進朕因其既已遠致不得不量收數種以聯上下之情其實內府所藏古器珍玩何物不有豈藉外間貴物以為觀美且伊等進到者大率

仍充燕賚分頒之用。今積久愈多。又豈宜復今日漸
增益乎。朕簡任封疆大臣。委以地方政務。惟視奉職
程其殿最。豈因進貢衡其短長。即如總督中惟高晉
不令屬員代辦。而伊所進貢品。亦不及他省。衆所共
知。朕因其平日實心辦事。不愧封疆之寄。特加恩用
為大學士。恩眷獨優。亦衆所共知者。不更可曉然於
朕意之所在乎。乃伊等不能善體朕意。專以此為誇
多闕靡。甚為無謂也。況古玩非布帛菽粟可比。飢不
可食。寒不可衣。本非貴重之物。而一經各省購覓。市
儈即從而高價居奇。其間自行售辦者。固亦有之。而

令屬員代備者。恐或不免。並有以多報少。略領價值。以為逢迎結納之具。此於吏治大有關係。不可不防其漸。至在京臣工。如王公頭品大臣。前因

聖母及朕躬大萬壽。准其呈進慶祝貢品。今亦每年踵以為常。相率效尤。實所不取。且每逢慶節之前。反覺煩冗可憎。又何益乎。至藩司尤係不應進貢之人。近亦有於陞見時。面為陳懇者。朕因業已加恩擢用。難以概行屏卻。遂亦許其呈進。略觀量存一二。究屬非體。又如內廷翰林。於年節書寫詩冊詩扇。及春帖子恭進。分所應然。又何必以購及古玩為事耶。至今日

人情漸趨於華。殊失瀉樸之意。昨偶閱熊學鵬家入
官物件內。有珠繡蟒袍。此必伊任巡撫時所辦。或備
而未進。或進而未收。俱未可定。此等費工價而不適
於用。朕甚鄙之。因即以賞人。並未留御。猶憶

皇考時。怡賢親王曾進珠繡黃褥。當即

諭其過當。朕遵守家法。宮中服御。從不用珠繡。又如象
牙織簾。工巧近俗。又不平滑使用。遠不及尋常茵席
之安適。因亦擯而不用。久有旨毋許再進。此亦可知
朕之好尚矣。嗣後各省督撫。除土貢外。毋得復有進
獻。在京王公頭品大臣。及內廷翰林等。亦當一體遵

照。四。十。三。年。

諭。昨。歲。曾。諭。督。撫。等。不。許。呈。進。貢。品。今。年。尚。在。二。十。七。月。之。內。本。不。以。端。節。為。事。而。各。處。頗。有。紛。紛。進。貢。者。此。在。織。造。鹽。政。稍。備。紗。緞。等。物。以。循。常。例。猶。不。為。過。乃。督。撫。等。亦。相。率。效。尤。實。所。不。取。是。以。仍。行。發。還。恐。伊。等。不。能。仰。體。朕。意。於。今。歲。萬。壽。復。行。呈。進。更。屬。非。禮。况。秋。間。正。值。朕。詣。盛。京。恭。謁。

祖。陵。若。於。途。次。馳。進。貢。物。尤。為。煩。瀆。而。先。期。進。貢。更。屬。當。戒。斷。乎。不。可。且。督。撫。等。惟。當。盡。心。職。事。副。朕。委。任。更。何。必。以。貢。獻。見。長。耶。將。此。再。行。宣。諭。知。之。又。

諭。本日據巴延三奏。起獲張鑾同夥私販之衛全義寄賣各玉器內。有玉如意一枝。票內開價銀四千兩。覽之深為駭異。前次屢降諭旨。禁止貢獻。而督撫等於呈進方物時。間有以玉如意附進者。朕因如意義寓祥占。且計所值無幾。間亦賞收。以聯上下之情。初不知商人等之居奇罔利若此也。今閱單內。衛全義所寄之玉如意一枝。需售四千兩。實出情理之外。其餘玉器價值。概可想見。姦商輩以近市三倍之心。貪得無厭。高擡市值。以惑人。固屬可恨。而督撫等不惜重價購覓。亦屬愚而無謂矣。朕於整玉如意。本非所喜。

是以座右陳設。止用鑲玉者。而不用整玉。乃衆所共知。况回疆玉料。琢成器皿。朕一見即能辨識。今既徹底查禁。將來自不敢復有違犯。但舊時存者。恐尚不少。豈可仍聽市僧之昧心漁利。現諭督撫等。即朕七旬萬壽。亦不准進貢。其或偶於方物附呈者。不得仍用和闐整玉如意。及大件玉器。即呈進亦必不收。使姦商無利可圖。其弊自息。○四十四年

諭。向來端午節。督撫等並無進貢之例。惟兩江閩浙湖廣等省。所進土貢。有在午節呈遞者。如茶扇香葛之類。各因土物之宜。原所不禁。其餘無土產省分。並不

隨衆同進。乃今歲各省督撫亦復一例呈獻。殊為非理。現已諭令奏事處將山東雲南貴州等省所進物件概行發還。不准呈覽。並著傳諭各省督撫嗣後務遵向例。如有歷年端節進獻土物者。仍准照舊呈進。至向來並無土物進貢各省。不得踵事增華。另列端陽貢名目。紛紛進獻。將此遇各督撫奏事之便。傳諭知之。又

諭。向遇年節。督撫等原無貢登之例。惟直隸距京甚近。從前方觀承曾於年底進登數件。以備賞用。此後周元理楊景素相沿呈進。尚屬可行。其餘遠省。從無此

事。督撫惟在勤職奉公。實心辦事。前曾屢降諭旨。禁止貢獻。乃今歲各省頗有貢銜者。殊屬無謂。現已諭令奏事處。凡向來未經進銜之各督撫。一概不許接遞。如有仍復進獻者。當以違制論。將此通諭知之。

四十五年

諭。前以庚子年為朕七旬萬壽。恐內外臣工。欲申祝嘏。屢經宣諭飭禁。此次南巡回鑾後。一俟

北郊禮成。即起程幸避暑山莊。各督撫等皆不必前來稱祝。更恐外省督撫不能仰體朕懷。聞因七旬萬壽。有取九九之儀。購備貢品。誇多鬪靡。甚至力有不逮。

而隨衆效尤。勉為充數。尤屬不必。各省督撫身任封疆。惟當大法小廉。奉公勤職。副朕委任。本不當以進奉見長。著再傳諭各督撫。今年八月慶辰。一切仍照常例。若借七旬萬壽為名。多事繁文。以申媚茲之悃。不但為朕所不取。且現今降旨。令奏事處屆期遇有多進貢物者。一概不挂接收。諸臣其善體朕意。毋得藉詞請覲。致增煩費。轉滋擾瀆。將此通諭各督撫知之。又

諭。前以督撫等呈進貢物。漸覺踵事增華。屢經宣諭飭禁。不啻至再至三。本年萬壽節前。即慮及王公大臣

及外省督撫等。不能仰體朕懷。購備多品。以申慶祝。因復降旨通行曉諭。以期黜華崇實。乃諸臣等仍不免有誇多鬪靡之習。但朕七旬慶節。非常年可比。且因其遠道誠殷。不得不酌留數件。其餘概行發還。並有諭奏事處。不准接遞者。諸臣等諒亦共見共聞。知朕意之所在矣。夫內外大臣。果心存忠愛。惟當實心任事。為國家抒蓋宣猷。豈藉貢獻以為報效。在督撫等。各就地方所產土物。如荔支茶葉之類。呈備賞賚。尚屬任土作貢。乃競以金玉銅瓷。紛紛羅列。朕實厭之。即如法瑯一種。必須銅製造而成。耗費銅筋實甚。

目下錢價漸昂。安知非此項無益之費所致。且進獻不已。各督撫中甚或有藉詞巧取。以為婪索之端。則流弊何所底止。其所關於吏治民生甚大。尤不可不力為防禁。嗣後除各省應進土貢。及各鹽政關差織造等。例有官項採辦物件外。其內而王公大臣。外而督撫。毋得再有呈進。如謂祝釐申悃。上下聯情。將來朕八旬萬壽。尚可俯從。其常時一概不得再有煩瀆。諸臣其共勵寅清。各勤職業。毋更存進奉見長之念。

○四十七年奏准。各省督撫。備辦珠玉寶玩。配入貢品者。治以違

制之罪。○四十八年

諭。向來內外臣工。每遇萬壽慶節。備物呈進。率成例事。今歲秋間。朕自熱河起鑾詣盛京。恭謁

祖陵。蹕路經由蒙古部落。道路較遠。長途煩費。更多未便。所有本年萬壽貢物。不必先期齋赴熱河呈進。王大臣及各省督撫等。務仰體朕意。毋滋煩瀆。○四十九年

諭。福康安永德奏。查審粵東鹽商。派捐公費。分別定擬一摺。已批交留京辦事王大臣會同該部議奏矣。此案前據譚達元呈控後。朕即疑有藉端派斂等事。是

以特命福康安永德先後馳赴粵東查辦。今據福康安等徹底查明。巴延三於公費一項。雖別無侵漁等事。而因循積弊。任聽該商等派捐公費。採買物件。據為己之貢物。情弊顯然。向來各省督撫。備貢土物。抒忱以聯上下之情。原所不禁。在本人惟應將廉俸所餘。自行置備。即派令屬員代辦。尚且不可。而况商人乎。即不進貢。有何不可。乃粵省自二十四年立總商以後。竟公然派令商人私捐公費。津貼價值。已屬有干禁例。該督等又攘為己物進貢。並未奏明。以致積弊相沿。竟成派累。尤屬不成事體。今據該商等呈出

貼補公費清單。歷任總督。俱用銀至三萬餘兩。至五六萬兩不等。而楊景素在任未及一年。竟倍用至六萬餘兩之多。其藉端勒索。侵貪入己。更出情理之外。今楊景素業已身故。姑免深究。所有歷任總督等派捐銀兩。自應令其照數繳出。解交浙江省。以備海塘應用。又福康安等另摺所奏。商人幫辦物件一事。請俟一二年後。商力充裕。督臣代為奏進貢物等語。所奏更為不可。商人等承領帑項。營運交課。不過微末之人。原不得越分呈進貢物。近如兩淮浙江長蘆商人。間有豫備行宮等事。亦因省方問俗。經過該處。疊

澤恩施。該商等自忖忱悃。是以准其呈進。豫備。仍優
加恩賚。其獲利均不啻數百倍。徒粵東商人。本無此
等事。自不得援以為例。即使藉資官鹽。營運獲利。商
力益得寬裕。亦藏富於民之道。且各省商人。有因偶
值軍需。公捐者。無不交部議敘。廣東亦曾有其事也。
據將來該省附近等處。設有地方公事需費。該商等
所獲贏餘。積累日久。報效便民之事。該督等彼時再
據情奏聞。亦無不可。所有福康安等所奏督臣代進
貢物之處。竟應議駁。○又

諭。留京辦事王大臣議覆福康安舒常等酌籌粵省洋

行事宜一摺。內稱該督撫及監督等土貢內購買洋貨鐘表等物。飭洋行各商。公同定價。又洋貨內珍珠寶石等項。抽稅易於偷漏。應令新任監督等悉心籌酌。以期永久無弊等語。國家撫馭外洋。不貴異物。每歲番民與內地洋行。交易貨物。俾需利益。原所以體恤商夷。至洋貨內鐘表等物。不過備驗時刻。向來粵海關原有官買之例。而廣東督撫監督等。往往於土貢內亦有呈進者。今內務府造辦處。皆所優為。更無事外洋購覓。既經查明。自應嚴諭裁禁。嗣後督撫等。於鐘表二項。永遠不准再行呈進。並珍珠寶石等項。

原無需用之處。向來粵海關抽稅亦屬無多。況此等物件。本難定價。易至居奇。且便於攜帶藏匿。勢難保無偷漏分肥。否則過於吹求。若設法嚴禁。逐項按查。實屬不成事體。現在京師及各處關隘商稅則例內。本無此項稅課。不如聽商人等自行交易。免其收稅。則諸弊悉清。更毋庸多方防範。嗣後粵海關珍珠寶石。概不征收稅課。著為令。○又

諭。本日富躬進呈端節土貢。內有香料等件。殊屬無謂。向來織造監督。於進呈香料物件。以備賞賚。已屬用之有餘。各省督撫。從無備進之事。乃近日督撫等頗

有漸進香料及陳設等物者。嗣後止須將本處土宜如廣東之泡速香。湖廣之葛麻。四川廣西之藥材等類。入貢尚可。其非本省土產以及陳設等物。俱不得濫行呈進。○五十年

諭。各省督撫。因賞給養廉豐厚。每遇萬壽節。例各備物進獻。經降旨飭諭。不得誇多鬪靡。致滋奢費。前因四川雲南陝甘湖廣督撫。於承緝逃兵不力。所得養廉。分別議罰。以示懲儆。又恐伊等養廉全扣。辦事未免竭蹶。准其分年扣繳。各督撫捫心自問。如何益加愧勵。各謹廉隅。繼思伊等養廉。既已扣繳一半。若復照

舊備物進呈。誠恐因此藉口。派令屬員代辦。更於吏治大有關係。所有逃兵處分罰俸養廉之各督撫。於本年萬壽節。俱不准其備物呈進。至薩載李奉翰。亦因挑濟運河。建築廂座。未經妥協速辦。以致河水淺阻。罰令分賠。伊等既有賠項。且現在運河水小。漕船尚未能前進。伊等貢物。向由水路運京。沿途運送。必更費力。薩載李奉翰。於萬壽節亦不必備進貢物。以杜藉口之漸。各督撫等。務宜仰體朕意。遵照奉行。○

五十一年

諭。從前廣東督撫及粵海關監督。每年呈進貢品。俱令

洋商採辦物件。賠墊價值。積習相沿。商人遂形苦累。上年欽派尚書福康安前往查辦。將巴延三等分別治罪。明降諭旨。嚴飭該督撫等。嗣後不准呈進鐘表洋貨等物。並嚴禁地方官向商人墊買物件。以杜弊端。今粵海關監督穆騰額奏稱。該商等感戴恩施。代為呈貢物件。但粵省洋商。究非兩淮可比。此次例進物件。業已到京。姑准留用外。嗣後不准該商等再行呈進貢物。俾商力益得寬裕。至粵海關監督。向不呈進貢物。自德魁由如意館出任監督。備物呈進。李質穎等遂相沿辦理。第念該監督。每年養廉。不過二千

五百兩。辦公及家用外。未必能多有餘資。不可與三處織造及鹽政養廉豐厚者比。嗣後該監督亦不准備物呈進。至該督撫及監督等。不得因洋商現已停止進貢後。藉端令其墊買物件。致滋擾累。以示朕體恤遠商之至意。若日久廢弛。故智復萌。必重治其罪。

○五十三年

諭。前據王公大臣及直隸將軍督撫大吏等。以乾隆五十五年。朕八旬萬壽。願請舉行慶典。已俞所請。其應備儀文典儀。恐不無踵事增華。致滋煩費。因專派大臣董理其事。現經阿桂等酌籌經費。奏定章程。王公

大臣及將軍督撫等。分別銀數。於廉俸內坐扣備辦。亦已准行。以遂其效誠獻悃之心。第念各督撫等。抒忱祝嘏。既將五十五年。分養廉扣辦。其餘贖廉俸。尚須留為辦公之用。若是年該督撫等。仍照每年之例。備進萬壽貢物。未免稍形竭蹶。况所進物件內。如寶座屏風。各宮皆有陳設。不便更換。即佛像亦屬過多。無處供奉。亦無另建廟宇之理。其五十五年萬壽貢品。不但各督撫等俱不准其呈進。即王公大臣等亦毋庸備進。至各該省是年應進土貢內。除橘子荔枝石花魚哈密瓜等物。仍照舊呈進。以備薦新之用。其

餘土物。概行停止。以示朕體恤臣工之意。六十年
諭。舊例在京大臣及督撫等。每逢年節備物進呈。酌量
賞收。原以聯上下之情。來歲丙辰。屆朕歸政為太上
皇。若於年例之外。添備一分呈進皇帝。則伊等所得
廉俸。或不敷辦公。且恐外省督撫。致有藉端私行派
累之事。若止備進一分。伊等於心。又有未安。國家百
年昇平。大內備貯陳設物件甚多。原可無需再行呈
進。徒滋糜費。著自丙辰年為始。內外大臣所有年節
三貢。竟毋庸備物進呈。惟元旦及朕與嗣皇帝壽辰
慶節。在朝王大臣亦止須備進如意。以迓吉祥而伸

忱悃。逾日仍不過分賜衆人也。至各省土貢及鹽政織造關差年例辦進物件。如果品茶葉之類。係備頒賞之用。應仍照向例次數備進一分。不得復有增添別物。內外大臣職任部院封圻。惟當恪共盡職。勉思報稱。原不在備物抒誠。嗣後務須仰體訓諭。遵照辦理。如有仍前備物瀆進者。必當交部議處。○嘉慶四年

諭朕恭閱

皇考硃筆。有嚴禁內外大臣進呈貢物

諭旨二道。

聖訓煌煌。

垂戒至為明切。夫貢之為義。始於禹貢。原指任土作貢而言。並非崇尚珍奇。所謂不貴異物賤用物也。我

皇考頒諭飭禁。至再至三。止因和坤攬權納賄。凡遇外省督撫等呈進物件。准遞與否。必須先問和坤。伊即擅自准駁。明示有權。而督撫等所進貢物。在

皇考不過賞收一二件。其餘盡入和坤私宅。是以我

皇考雖屢經禁止。仍未杜絕。試思外省備辦玉銅瓷書畫插屏挂屏等件。豈皆出自己資。必下而取之州縣。而州縣又必取之百姓。稍不足數。敲扑隨之。以閭閻

有限之脂膏。供官吏無窮之朘削。民何以堪。况此等古玩。飢不可食。寒不可衣。真糞土之不若。而以奇貨視之可乎。國家百數十年來。昇平昌阜。財賦豐盈。內府所存陳設物件。充牣駢羅。現在幾乎無可收貯之處。且所貢之物。斷不能勝於大內所藏。即或較勝。朕視之直如糞土也。朕之所寶者。惟在時和年豐。民物康阜。得賢才以分理庶政。方為國家至寶耳。至應進土貢。原為日用所必需。如吉林黑龍江將軍。每年所進貂皮東珠人參。係該處所產之物。其他如川廣之藥材。九江之甕器。江浙之紬緞。及徽墨湖筆。戕紙茶。

葉瓜果等項。原不外任土作貢之義。仍准按例呈進。所有如意玉銅菱書畫插屏挂屏等物。嗣後概不許呈進。至在京王公大臣。每年所得分例。尚不能敷當差之用。豈有餘資。亦不許呈進貢物。若內廷翰林所錄御製詩文冊頁。及自作書畫等件。尚可呈進。斷不許增入古玩。至各省鹽政織造關差等。並無地方理民之責。其應交贏餘銀兩。現今戶部查明。方擬酌減伊等辦公。更可裕如。應進貢物。准其照例呈進。再年節王公大臣督撫等。所進如意。取兆吉祥。殊覺無謂。諸臣以為如意。而朕觀之。轉不如意。亦著一併禁止。

此次嚴諭之後。諸臣等有將所禁之物呈進者。即以違制論。決不稍貸。○又

諭。昨日慶霖呈進閩海關土貢。朕憶向年

萬萬壽聖節。方有此貢。猶恐奏事處錯行轉奏。因命軍機大臣檢查奏事處檔案。歷年均係七月二十後呈進。至八月間。並未另有

萬萬壽貢件。是慶霖竟係循照年例。冒昧呈進。實屬非是。除將貢物擲還外。慶霖著交部嚴加議處。至慶柱於伊弟呈進不合之處。並未阻止。亦屬疏忽。著交都察院議處。其奏事官及奏事太監。尚無錯誤。俱著免

議。又

諭兵部議處違例呈進土貢之福州將軍慶霖。請照違制例革職一摺。各省呈進貢物。節經降旨。嚴行飭禁。現屆八月十三日。為

皇考萬萬壽誕辰。朕既不能奉觴稱慶。而明歲九旬萬萬壽。又不獲躬率天下臣民。祝

嘏。臚歡。用申孝養。每瞻

靈几。哀慕方深。慶霖乃循照年例。呈進土貢。益令朕觸緒增悲。殊屬冒昧。即照部議。以違制例革職。實為罪所應得。姑念慶霖由侍衛出身。擢任將軍。心地糊塗。

於體制不能諳悉。且因兼管閩海關務。所進止係土物。又屬初次。著從寬改為革職留任。惟是此次慶霖得邀寬宥。或外間無識之人。妄意前此飭禁。雖奉有明諭。而違例呈進。其革職處分。仍可邀恩留任。又視為具文。遂思傲幸嘗試。冀開進奉之門。此則有意測探。大非朕此次施恩之意矣。從前進貢一事。

皇考亦屢經額諭嚴禁。而督撫等仍間有備物呈進者。皇考因其既經備進。或賞收一二件。藉聯上下之情。然亦甚為可厭。今朕志先定。斷不容臣工等有陽奉陰違之事。朕在藩邸時。一切服御起居。概從簡樸。而親

政後尤以崇儉黜華。冀厚民生而敦饒裕。現在宮禁之中。所貯珍寶玩品。極為充牣。飢不可食。寒不可衣。可見此等珍奇。止屬無用之物。况外省備進貢物。名為奉上。其實藉以營私。每次未收之件。既可分饋權要。又可歸入私囊。而屬員等競事逢迎。輒以幫貢為詞。藉端派累。層層取巧。以致小民朘削難堪。大抵進奉一節。最為吏治之害。此朕所深悉弊端。而必加嚴禁者也。此次朕之所以寬恕慶霖者。實因伊係武職。糊塗所進。止係方物。其咎不過冒昧。尚非欲倡為此舉。首先嘗試。是以姑免革職。儻臣工等誤會朕意。欲

藉此營私見好。仍冀得免嚴議。則是有意效尤。不但照違制例革職。必當重治其罪。決不姑寬。朕如此披誠訓諭。而內外臣工。多有不能深知朕者。欲陷朕好貨之名。快其私憤。使其私圖。雖係以小人之腹度君子之心。不足與較。然朕之苦衷。亦不可不宣示也。至慶桂在京供職。相距伊弟任所較遠。慶霖呈進不合之處。未經阻止。其咎尚輕。著照部議查級。准抵免其降調。○又

諭。各省呈進方物。原以備賞賚之需。現在二十七月之內。萬壽慶節。並不舉行筵燕。無須頒賞。所有各督撫

及鹽政關差織造應進方物。概行停止。呈進。若中秋節令。外間不遇以瓜餅食物酬酢往來。內廷並無燕賚之例。尤非萬壽及端陽歲除可比。嗣後中秋節貢。著永遠停止。○五年

諭。來年七月內。啟鑒恭謁

祖陵。向聞該處辦差各員。每有藉端科派等事。以致丁民等紛紛呈控。朕所深知。正欲明降諭旨。飭禁一切浮費。適御史茅豫奏稱。上次隨從大小官員。出關後。地方官按站供應。分送土儀。甚有索取貂皮人漫之事。先期豫備。藉端科斂。請嚴行禁止等語。所奏甚是。

來年謁

陵。途次應行鑲墊道路。修葺橋梁。均准照例開銷。盛京殿宇。曾經降旨。止須略加掃除整理。不必華美飾觀。其蹕路所經。備用房母許豫備陳設。點綴彩飾等事。屆期該將軍等不許呈進貢件。即土物亦無需用之處。均不准呈進。朕敦崇儉樸。實以陪都根本重地。不肯絲毫擾及閭閻。大小臣工各宜仰體朕意。所有扈蹕官員。沿途毋許勒取供應。其有需用土物。原應自行購辦。不得向地方官需索。地方官亦不得藉辦差之名。任意苛派。儻有前項情弊。經朕察出。或別經發

覺。必當從嚴懲辦。決不寬貸。○七年

諭興肇等奏稱。此次和闐採獲白玉二十七斤。次白玉二十四斤。各一塊。請將回子伯克伊斯瑪伊勒愛瑪爾霍卓二人。賞戴花翎。回子愛瑪沙等七人。賞戴金頂等語。所奏殊屬非是。和闐為產玉之區。該處伯克率領回民。撈獲玉石。每年解運進京。止係任土作貢之意。今興肇等因伊斯瑪伊勒等採獲白玉二塊。斤數較重。輒請賞給翎頂。此玉有何足貴。翎枝頂戴。為國家名器所關。該伯克及回子等。如果奮勉勤能。於防卡屯田一切差使。辦理妥協。該大臣據實奏聞。必

照所請加恩。用示獎勵。豈得以採獲玉斤較重。為伊等之功。濫行懇請乎。朕數年以來。節經降旨。停止中外臣工貢獻。凡金玉珠寶等物。概不准呈進。前葉爾羌採得數百斤成塊大玉。業已運送起程。曾降旨即於所至地方截留棄置。興肇等寧不知之。况此區區數十斤之玉。又何足為貴乎。朕所寶者。惟在時和年豐。民安物阜。一切耳目玩好之物。素性實所鄙棄。若如興肇等所奏。獲一玉塊。即錫以翎頂之榮。則伯克回子。勢必爭相慕效。專以採採大玉。希冀邀恩。而外間無識之徒。或因妄生揣摩。此則甚有關繫。興肇額

勒金布。均著傳旨申飭。其所請賞給翎頂。伊斯瑪伊勒等。俱不準賞給。並曉諭各伯克回子等。嗣後惟當實力當差。如有出力之處。該大臣等奏聞時。必當加恩賞賚。至此回子等因未得大玉。誦經祈求。此語如果屬實。更覺無謂。豈採得大玉。即為伊等報效乎。所有現獲二塊大玉。如可乘例貢之便。送京。方准其附帶。若沿途運送。稍有不便。即擲於該處。不必呈進。

○十三年

諭朕自臨御以來。嚴飭各督撫等。於任土作貢之外。不得別有進獻。各督撫等日久遵循。罔敢違逾。自己咸

知朕意。惟來年為朕五十誕辰。該督撫等承受渥恩。情殷祝嘏。或以五旬慶節。非常年萬壽可比。輒欲競獻珍奇。用申誠悃。或督撫本無此意。而屬員等藉端慫恿。希圖見好。且可從中獲利。亦情事之所必有。在封疆大吏。共礪廉隅。斷不致因祝釐進獻。致有簋簋不飭之事。但恐此端一開。則爭長見巧。誇多鬪靡。其弊有不可勝言者。况宮府所藏百物。充牣。朕躬行節儉。凡珍異華美之物。皆所不取。實由天性。初非出於矯強。諒亦諸臣所共喻。明年五旬慶辰。除該督撫等應進土貢。仍准循例進獻備賞外。所有金珠玩好各

物。概不進。若督撫中有准其屆期來京申祝。亦止。准呈遞如意。或係科甲出身。素工詞翰者。並准其進獻詩冊書畫。俾展慶忱。僕經此次訓諭之後。該督撫等復又違例進獻珍玩者。必當加以譴責。該督撫等務宜敬謹懍遵。以副朕黜華崇實。諄諄教誡之至意。○又

諭。從前我

皇考高宗純皇帝萬壽旬慶。皇子皇孫等祝嘏呼嵩。情殷慶獻。仰蒙

俯鑒。悃忱。曲加體恤。豫

賜多金。備進貢品。

延釐錫福。

盛典昭垂。明歲為朕五旬萬壽。諸王誼屬宗親。自必同
殷祝頌。因思儀親王成親王。係朕之兄。慶郡王永璘。
係朕之弟。定親王綿恩。在朕諸姪中居長。且係御前
大臣。其次即榮郡王綿億。亦在內廷行走。俱較諸王
為近。允宜酌加錫賚。用遂抒誠。儀親王成親王慶郡
王永璘。著各賞銀一萬兩。定親王綿恩。著賞銀八千
兩。榮郡王綿億。著賞銀六千兩。均由造辦處給發。祇
領。俾從容備進貢物。此外諸王。仍照每年萬壽慶節。

循例獻祝。毋許多備貢品。儻於例外加增。朕亦斷不賞收。諸王其各懍遵訓諭。以副朕意。○十九年

諭。向來雲南土貢。例進銅鑪。浙江歲進嘉鑪湖鏡。兩淮歲進銅火盆。相沿已久。歷年所積。宮內存貯者甚多。朕愛惜物力。思以有用之銅斤。度之無用之地。殊為虛擲。現在錢局官銅。未為豐裕。若省此耗費。俾廣為流通。於鼓鑄不為無益。著傳諭該督撫鹽政。此數項銅器。嗣後均毋庸呈進。則鑄造者少。而地寶胥歸利用矣。○二十三年

諭。朕五旬誕辰。曾先期降旨。不准各督撫進獻金珠玩

好等物。來年為朕六旬正誕。該督撫等情殷祝嘏。因朕壽登周甲。又非五旬可比。或欲加意增華。用抒忱悃。惟是吏治未淳。民俗未正。方抱愧之不暇。况朕敦崇節儉。出於天性。來年並不舉行慶典繁儀。著通諭直省督撫。除應進土貢。仍循例備進外。所有金珠玉器陳設。仍一概不准進呈。其督撫中有派出屆期來京祝嘏者。准其呈遞如意。暨詩冊書畫。並備賞綉緞。以及食品等件。俾展慶忱。該督撫等務各敬謹懍遵。用副朕諄諄誥誡之至意。○道光元年

諭。各省督撫鹽政織造關差。向遇年節萬壽。均有呈進

方物之例。惟是行之有年。不免踵事增華。有加無已。雖

皇考屢申飭諭。尚未能盡除浮靡。茲朕在諒陰之中。若不先行示諭。定以限制。一俟釋服後。自必相率效尤。紛紛呈獻。是以朕將從前貢目。詳加披閱。例應貢者。准其呈進。可刪者即行刪去。嗣後應進方物之處。俱著遵照硃筆圈出之物件數目。照例呈進。毋得任意加增。設遇某件不敷採辦。儘可缺而不貢。斷不准將別項數目加增。或以他物代進。其吉祥貢一端。著永行停止。發去硃圈貢目。仍各遇便繳回。以備查覈。至

廣州將軍。並無兼理關稅事務。其每年例貢。著毋庸呈進。○又福建巡撫顏檢密陳閩省歲進荔支樹素心蘭二種。採辦運送情形。奉

旨。荔支樹素心蘭二種。措辦非易。乃朕素所深知。而又係無用之物。故去歲特降旨將其停貢。彼時內務府未能明白傳諭。似俟三年後。仍行照舊呈進。朕意原是永行裁革。汝當遵此硃諭。嗣後二項永遠不必呈進。汝能如此直陳。朕甚嘉焉。○又

諭。前因孫玉庭本年七十生日。特加恩賞。茲據齋到回進貢物。在孫玉庭固屬出於誠悃。並無不合之處。但

現當二十七月期內。朕於各省一切例貢。正在酌行
覈減之時。若此次准收孫玉度貢品。恐各省相率揣
摩。藉端紛紛呈獻。轉非朕黜華崇實之意。所有孫玉
度原進貢物。均著發還。○又

諭。各省督撫鹽政織造關差。向有呈進方物之例。前將
各貢目大加刪減。示以限制。令於二十七月後。遵照
呈進。所降諭旨甚明。乃該鹽政織造關差。本年即行
備物呈遞。實屬拘泥糊塗。不曉事體。除將如意及彩
繡等件發還。留俟明年再行呈進外。延豐七十四嘉
祿福德阿勒精阿。均著傳旨申飭。○九年

諭。從前乾隆嘉慶年閒。每遇

聖駕巡幸盛京。恭謁

祖陵。盛京吉林各將軍。均有例進土貢。但止就各該處所產土物呈進。以輸忱悃。原不准踵事增華。徒滋糜費。朕本年八月恭奉

皇太后慈輿前詣盛京。祇謁

祖陵。該將軍等。著仍准照例呈進土貢。惟此次諸事概從節省。該將軍等所進土貢。務當比照從前酌加覈減。斷不准稍有增多。致負朕黜華崇儉之至意。○十

年

諭楊遇春奏懇免口外梨貢一摺。口外梨貢向例由陝甘總督衙門差派弁兵赴吐魯番採買進貢。該處距內地數千餘里。所辦梨果仍交伯克代為採購。惟念該處窮苦回子。咸藉所藝梨果為生。每年差往弁兵雖經嚴立期限。飭令照額採辦。毋許擾累。誠恐道遠稽察難周。其承辦之大小伯克輾轉假手。亦不免藉端擾累之弊。著自本年為始。將此項梨貢即行停止。以杜滋擾。而示體恤。○十六年

諭。每年正月內山高水長所用煙盒花爆等項。向由兩淮鹽政豫備解京應用。嗣後著永行停止。○二十五

年題准。

皇太后七旬大慶。王公大臣等停止進獻禮物。二十

九年

諭。朕於各省貢物。裁汰大半。惟河南地方。向產百合。清
潤可食。著潘鐸選擇四五桶。解京備用。嗣後每年均
著按期呈進。即照此次之數。毋庸加多。三十年正
月

諭。各省督撫鹽關。向有呈進方物。朕現在諒陰之中。食
處皆所不安。著通諭各省督撫。鹽政織造關差等。一
應貢獻。概行停止。即食品亦不准呈進。俟三年之後。

再候諭旨。○咸豐三年長蘆鹽政文謙奏端陽萬壽貢品現赴蘇杭採辦尚未到津奉

旨。所有本年端陽萬壽各貢品均不必呈進。俟採辦到津時即作下次例貢亦不必補進。並著內務府查明各處本年貢物有不克到京者著奏明。統俟軍務完竣再行呈進亦不必補進。○又江蘇巡撫奏端陽例貢。俟收復江甯後補行呈進奉

諭。所有各項貢物統俟軍務告竣再行按期呈進不必補進。